

## **Dithero tsa Tirelano mo Kutlwanong**

39/2015 Thero ka Sontaga wa 7 morago ga moletlo wa Borarobongwe, e le ka 19. 07. 2015

Mo leineng la Modimo o e leng Rara, le Morwa, le Mowa o o Boitshepo!

Lefoko le le okamelang beke eno, le kwadilwe mo go Baef. 2:19, le re: "Ga lo tihole lo le baeng le bajaki, mme lo ba morafe mmogo le baoitshepi, lo ba ntlo ya Modimo."

1. Sefela sa 114 – -/-; 374 - 346/353

**2. Thapelo:** Jesu, Morena wa rona, re lebogela thata ya gago e e tlhomileng tumelo ya rona go wena. Kwa re tlhaselwang ke letswalo le pelaelo teng, re kopa gore o nne le rona. O re tiise ka Efangele ya gago e e leng lefoko le lorato lwa ga Rara wa rona yo o mo legodimong. Amen.

3. Lefoko la Testamente e kgologolo le kwadilwe mo go Ekes. 16:2-3. 11-18;

Epistolo ka fa thulaganyong ya 2 e kwadilwe mo Ditirong tsa Baapostolo 2:41-47

Efangele ka fa thulaganyong ya 3 e kwadilwe mo go Johane 6:30-35.

4. A go ipolelwe tumelo ya bokeresete!

5. Sefela sa 163 - -/- 161 - 144/147

6. Thapelo ya mmadi wa thero.

**7. Efangele** ka fa thulaganyong ya 1 e kwadilwe mo go Johane 6:1-15, e re: "E rile morago ga tseo Jesu a tshelela kwa moseja ga letsha la Galelea, le e leng la Tiberia. Bontsi jo bogolo jwa batho jwa mo latela, ka ba bonye ditshupo tse a di dirileng mo balwetsing. Jaanong Jesu a tthatlogela mo thabeng, a nna teng le barutwa ba gagwe. Mme Tlologanyo, moletlo wa Bajuta, ya bo e le gaufi. Ya re Jesu a tsholetsa matlho, mme a bona bontsi jo bogolo bo tla go ene, a raya Filipino a re: 'Re tla reka dinkgwe kae, gore bao ba je?' Mme a bo a bua jalo, e le go mo leka fela; gonne ene ka esi o ne a itse se a tla se dirang. Filipino a mo araba a re: 'Dinkgwe tsa diranta di le 40 ga di ka ke tsa ba lekana, gore mongwe le mongwe a amogele go le gonnye.'

Mongwe wa barutwa ba gagwe, e bong Andrea, morwa-rraagwe Simone Petoro, a mo raya a re: 'Mosimane ke yo, o na le dinkgwe tse tlhano tsa garase, le ditlhatswana tse pedi; mme tse a ka nna eng mo bontsing jo bo kana?' Ke fa Jesu a re: 'Nnisang batho fa fatshe!' Gona foo go ne go le bojang jo bontsi. Jaanong banna ba nna fa fatshe, palo ya bone e ka ne e le dikete tse tlhano. Jesu a ba a tsaya dinkgwe, a leboga, a di abela barutwa, mme barutwa ba di abela ba ba ntseng fa fatshe; le tsona ditlhatswana fela jalo, ka fa ba ratang ka teng. Ya re ba sena go kgora, a raya barutwa ba gagwe a re: 'Selang masadisa gore go se latlhege sepe.' Ba a sela, ba tlatla ditlatlana di le 12 ka masadisa a dinkgwe tse tlhano tsa garase a a setseng mo go ba ba jeleng. Jaanong ya re batho ba bona sesupo se o se dirileng, ba re: 'Ammaaruri, ke ene moporofeti yo go tilweng o tla tla mo lefatsheng.' Ya re ka Jesu a lemoga gore ba tla tla go mo tsaya ka thata go mo dira kgosi, a ngwega, a boela gape kwa thabeng a le esi." Amen.

**8. Thero:** Lona baitshepi ba Morena wa rona Jesu Keresete, lona ba ntlo ya Modimo, ka Sontaga wa bosupa morago ga moletlo wa Borarobongwe, ke lo dumedisa ka temana e e okamelang beke eno, e e reng: "Jaanong he, ga lo tlhole lo le baeng le bajaki, mme lo ba morafe mmogo le baitshepi, lo ba ntlo ya Modimo," Baef. 2:19.

Kgoriso ya banna ba ba dikete tse tlhano ke kgakgamatso e kgolo, e le e ene Johane a ratang go re itsise le rona ka yona nonofo e kgolo ya Morena wa rona Jesu Keresete, a re reetseng tiragalo ka go tlhokomela gore maikaelelo ka yona ke a eng a Jesu a a ikaeletseng ka yona ka go dira kgakgamatso e kgolo e. Jesu o ne a rutile barutwa ba gagwe sebaka se seleele. Ke fa a ne a rata go ba tlhatlhoba gore a bone gore go na le eng se ba se ithutileng. Ke gona a ba boditseng, a re: "'Re tla reka dinkgwe kae, gore bao ba je?' Mme a bo a bua jalo, e le go ba leka fela; gonne ene ka esi o ne a itse se a tla se dirang." O ne a rata go bona gore a ba mo ikanya tota gore ba tla bona thuso mo go mang, fa ba kopana le matsapa a a ntseng jalo. Go ka re: ba sa ntse ba itshwarelela mo thusong e e leng ya bone fela, ba tle ba ineele mo poifong, gongwe mo pelaelong ya go gopola gore ba paletswe fela. Mo godimo ga tlhatlhobo eo Jesu o ne a ba rwesa ka bokete jo bongwe: Ya re ba sena go bolelela Jesu, ba re: "Felo fa ke sekaka, mme lobaka lo setse lo fetile; naya batho tsela gore

ba ye metsaneng, ba ithekele dijo;" a ba raya a re: "Ga go batlege gore ba tsamae; lona ba feng, ba je!" Go kwadilwe jalo mo go Math. 14:15-16.

Le rona ba re leng bakeresete, jaaka barutwa bale, re ntse re itemoga re re: Re tlwaetse go tshwarwa ke mathata, ke matshwenyego, a re paletsweng ke go a itshokela. Ka moo re latlhela matshwenyego ao mo go Jesu, yo e leng Modimo ruri, ka fa lefokong le le reng: "Latlhelang matshwenyego otlhe a lona mo go one, gonne lo tlamelwa ke one," 1 Pet. 5:7. Jesu o re solofeditse thuso, gore re fetisetse matshwenyego a rona mo go ene, a re: "Ga go batlege gore ba tsamae go ya go reka dijo, ka ene o tla ntsifatsa dijo tse di leng teng, Math. 14:16-20. Ke gona re tla makalang fela, ka rona ka rosi re sa itse se re ka se dirang, ga re na kwa re ka tsayang teng. Le tsona tse re nang natso, ga di lekane. Re tsena mo matsapeng a a re palelang. Ke fa re latlhegelwa ke tsholofelo. A lefoko la thero ya kajeno le re thuse gore re tlathlobe, re tlhotlhomise botshelo jwa rona, re lemoge gore matshwenyego a, a re tshwenya jang, re a sikara jang, re leke jang go a fenya, re ikakanye gore re bone gore Jesu Keresete re mo amogela jaaka Kgosi e e ntseng jang? Kana ene yo o nang le thata yotlhe o eletsa go re thusa. Re gopole ka metlha gore ka fa tsholofetsong ya gagwe re boleletswe ditiragalo tsa dikgakgamatso le tsa ditshupo tsa nonofo ya gagwe gore re dumele, fa e le Keresete, Morwa Modimo, re nne le botshelo jo bo sa khutleng ka go dumela mo go ene, Joh. 20:31.

Tlathhobo le tlhotlhomiso di diragala ka metlha mo go rona batho. Gantsi go buiwe ka ga dinonofo tse re nang natso tsa go fenya ditlathhobo le ditlhotlhomiso, re re: re a itse re ithutile, go a lekana mo botshelong, gongwe mo sekolong. Tlhotlhomiso e Jesu a e re nayang kajeno ka lefoko la thero ya kajeno, re re: e farologanya le tse di tlwaelegileng. Ga re nke re fenya ka thata ya rona, fa re kopana le yona. Re tla kgona go fenya fela ka go dirisa ditiriso tse re di fiwang ke ene, e bong Jesu yo o re tlhotlhomisang.

Ka go ikanya ditiriso tsa rona tsa go thantolola, re tla palelwa ke go thantolola matshwenyego a a ntseng jalo. Botlhale jwa rona jo bosi ga bo thuse sepe, ga bo kgone go thusa motho go kgona. "MORENA o nyeledise kgakololo ya ditšhaba, a senya maano a merafe," AmaH. 33:10. Ba ba reng: Ba tla kgona go dirisa dikhumo

tša bone ka bobone, le botlhale fela, ba a fosa. Salomo a re: "Fa MORENA a sa age ntlo, baagi ba yona ba tla bo ba itapisetsa lefela; fa MORENA a sa dise motse, modisa o tla bo a ithobaeletsa lefela," AmaH. 127: 1. Fa re utlwa lefoko la Modimo mo go tse re di dirang, o tla re betsa ka go re tlogela fela gore re ithobaeletse lefela.

Kgang e khutla ka fa boFilipo le barutwa ba bangwe ba e lemogileng ka teng go utlwala, fa ba ne ba sa kgone go kgorisa dikete tse tlhano tša banna. Ba re: "Dinkgwe tša diranta di le 40 ga di ka ke tša ba lekana, gore mongwe le mongwe a amogele go le gonnye." Ka thata fela ya motho go ntse jalo. Pono ya ga Filipo ya go palelwa ke ka ntlha ya eng? Gonne o ne a sa ikaege mo tumelong. Filipo ga a ka a bua jaaka motho yo o dumelang. Re ka re: O ne a sa ikaege ka go dumela mo Moreneng gore ene o tla kgorisa batho bale ka fa a kgonang ka teng.

Re tsamaya le Modimo. Ke ona o o tshegetsang matshelo a rona. Go ka dirafadiwa, fa re itshwarelela mo tsholofetsong ya ona e e reng: O tla re tlamela. A re se ka ra dumelela boikanyo gore bo re tlogele, le fa go ka tsaya sebaka gore thuso e goroge mo go rona, go dirafatsa dikgakgamatso tša ona mo go rona, a re se ka ra koafala mo tumelong ya go dumela mo go ona. Re ikanye ka fa Lefoko la ona le re laelang ka teng, le le reng: "Latlhelang matshwenyego otlhe a lona mo go one, gonne lo tlamelwa ke one," 1 Pet. 5:7. O re ruta go mo eleletsa le nonofo e o nang le yona, e o eletsang ka yona go re thusa. O a rata gore re dumele, re nne re o ikanye. Bogolo go moo re romelwa ke Jesu Keresete mo tirong e kgolo ya gagwe, re nne batshwari ba batho, ba ba jwalang peo ya Efangele, re se diege, re nne ba ba kotulang, re nne mmogo le ba ba kopanang le ba ba abelanang senkgwe sa botshelo. Yena o ntse a re romela sejo sa nnete re ntse re dira, ba re: "Mosimane ke yo, o na le dinkgwe tse tlhano tša garase, le ditlhatswana tse pedi." Modimo o abela ka go tshegofatsa tsotlhe mo tirong ya Jesu: Dikakanyo tse di tlhagang, dikattholo tse di atlholwang, madi a a tlhokegang, botshelo jwa mmele wa badiredi, mmogo le dithuo le dithoto tsotlhe. Le tseo di fa pele ka leitho la gagwe.

Re tlhokomelwa jaaka Baiseraele kwa Egepeto. Ke ene yo o tšatsang dijana tša bone ka dijo le nama, bone ba ba neng ba bolawa ke tlala thata. O ne a ba kgorisa gore

ba gopole gore o teng fa gare ga bone. Sejo sele se ne se sa tlhage fela, gape o ne a tlhaloganye gore ba go tlhokometse fela. Ka moo Modimo o bontsha go tlhokomela ga ona se se tlhokegang mo mothong mongwe le mongwe: Tlala, lenyora, thata, le botshelo. Modimo ke yo mogolo, e seng dijo!

Le rona re abetswe dineo tse dintsi tse Modimo o re kgorisang ka tsona. Ka dineo tsa ona o rata gore re di itumelele, re di diriese, bogolo re o godise, fa e le ona o o di re fang. Re amogele dineo mo go ona tsona tse di siameng, e le tse dintsi, gonne o re fa, ona ka bopelonomi jwa ona. E ne e se Mootli bogologolo fela, o sa ntse o re otlala le kajeno, o tla dira jalo le kamamoso. Bopelonomi jwa ona mo go rona ga bo fele; thuso e re e tlhokang o tla re thusa ka yona.

Kwa o re tlhotlhomisang teng o rata gore re lemoge se se tlhokegang mo tumelong, re lemoge go palelwa ga rona. O a re ruta gore re se ikanye tsa rona, mme re lebelele mo go ona, fa e le ona o o nang le nonofo e re ka ikgogelang mo go yona, fa re tlhotlhomisiwa.

Dinonofo tsa ona ke dife tse re ka di dirisang? Ke tsona ditsisabopelotlhomogi tsa ona tse o di re bontshang ka fa tlhagong ya tsona. Ke tsona dikgakgamatso tse a ikaeletseng ka tsona go dira, le go tlhoma, le go tlhomamisa tumelo mo go dipelong tsa rona ka fa go kwadilweng ka teng mo go Joh. 20:30-31. Le batho ba ba neng ba sa amogelwe, ba ba neng ba le kgakala, ke raya baditšhaba le bone ba setse ba ratilwe ke Modimo, le bone ba setse ba amogetswe go nna ba losika lwa ga Rara, re nne bangwe fela mo go Jesu Keresete, Morwaaona yo o rategang. Re laleditswe mo sejong, Jesu o re kopa, gore re amogelwe ke Rara, re tshegofadiwe, re nne re amogele, re tle re lebogele tse re di jang. Dibe le le tse dintsi tse di ka bolelwang ga di re thibele gore re otlwe ke ene. Le mo tlaleng, le mo lenyorelong la rona ene tse re ka tlhagelwang ke tsona, o tla re thusa go re ntsha mo go tsona. Mmele ruri wa gagwe le madi ruri wa gagwe go tlisediwa mo go rona gore re o je, re a nwe. Le melato e re nang nayo e tla tloswa mo go rona, e itshwarelwe.

A re amogeleng dikgakgamatso tsa gagwe gore re amogele le go gololwa gape ke ene mo letsatsing la ditlalelo. O ne a lebagana le tlala ya banna ba dikete tse tlhano. Ke lotshwao lwa gore le matsapa a le a magolo jang mo go rona, re ka letela, le go

solofela gore o tla a thantolola otlhe. Fa re mo ngongoregela, re tla nna mo mathateng. Ke Rara yo o nnang le rona, le fa re le mo tlalelong. Ga a re kobe, ka go re bolelela gore re ye go gongwe, gongwe kgakala. O reetsa dilelo tsa rona, o bona tlala. Ke ona o o re kgorisang.

O itse tsotlhe tse a tshwanetseng go di re direla, le kwa re iseng re kope mo go ene. O rata gore re direla ka tse di molemo. Re bana, ene ke Rara wa rona. Tse di bidiwang mo go rona, ke fa a rata gore re nne re itshoke, re lete ka tumelo gore o tla re ntsha mo ditlalelong, re di sikare ka go mo ikanya, re tle re se gopole gore o lwa le rona ka ditlalelo, le e seng go gopola gore o re tlogetse, o re galefetse fela. Kana ga a re tlogela. Kana o re tlhatlhoba, o re tlhotlhomisa ka tsona, bogolo tumelo ya rona. Le fa go ntse jalo, maikaelelo a tsona ke fa a rata gore re kgone mo go tsona ka thuso e kgolo ya gagwe e re e solofeditsweng ke ene ka lorato le bopelonomi. Thuto ya gagwe ka go tla ga gagwe, fa a ne a tla go re lwela, go re bogela, go bapolelwa mo sefapaanong, go re swela mo go sona, le go re tsogela mo losong ka ntlha ya go balelwa tshiamo ya gagwe ka go dumela mo go ene. Ke dikgakgamatso tseo tse di re nonofisang go fenya ditlalelo, dithaelo, le bolelo, tse e leng tsa rona. Amen.

**9. Thapelo:** Rara wa rona, Rraagwe Morena wa rona Jesu Keresete! Re lebogela dineo tse dintsi tsa gago tse re di amogelang, le fa re sa tshwanelwa ke go di amogela. O re fe gore re di amogele ka tebogo, O re thuse ka tsona gore tumelo ya rona e ate, e tlhomame. Tsoseletsa boikanyo jwa rona jwa go go ikanya. Tlosa mo go rona dipelaelo tsotlhe, le go nyatsa thuso ya gago. Amen.

Thapelo ya Morena: Rara wa rona yo o mo legodimong ...

10. Sefela sa 376 - 348/355

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke M. N. Mntambo, ka ngwaga wa 2015.  
Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.